

Selina Chönz, *La chastlauna*

L'autura engiadinaisa Selina Chönz (1910–2000) es cuntschainta per sieus cudeschs d'iffaunts – impustüt per sieu *Uorsin*. Sias poesias, publichedaas davent dal 1935, traunter oter aint illa *Musa rumantscha* da Peider Lansel (1950), e sias novellas sun invezza idas generelmaing in schmanchaunza. Üna da quistas novellas puteras, *La chastlauna*, es cumparida per la prüma vouta dal 1940 illa lingia da la Chasa Paterna. L'an passo, pel 500evel da la refuorma, ho Mevina Puorger preschanto la reediziun da quist'ouvrä exausta chi daspö es darcho accessibla al public rumauntsch.

L'istorgia d'amur da la chastlauna Giorgia a Castelmur es situeda in Grischun in ün context istoric dal 16evel tschientiner, ün temp inua cha la refuorma as fo plauget valair. La giuvna protagonista ho alura 24 ans e rapreschainta üna duonna emanzipeda ed independenta chi vo si'egna via, seguind uschè sia persiasiun confessiunela: «Eir eau sun convertida, bap, ed eau sun pronta da sacrificher tuot per mia persiasiun.» (p. 11)

Intaunt cha'l bap da Giorgia, il chastlaun Fortunat a Castelmur, resta fidel a valuors tradiziunelas, as distanziescha sia figlia dals dogmas da quel temp, sainza però s'aliener da sieu bap. Sia persiasiun e sieu curaschi chaschunan invilgias e la sforzan dafatta dad ir in praschun. Insembel cul fügitiv ed expatrio Celso da Martinengo decida Giorgia finelmaing da renunzcher als privilegis da la nöblia, da desister al titel da chastlauna e da's dedicher scu pura a la cultivaziun da sia terra. Quasi scu Candide da Voltaire sun ils duos spus da l'avis cha saja da «cultiver nossa terra». (p. 104)

A Selina Chönz gratagia que da confrunter e masder in möd interessant fats istorics e personas reelas cun figüras fictivas ed elemaints inventos. Cun ün tschert patos descriva ella il minchadi alpin da quel temp e l'atmosfera tuottafat unica intuorn il lej da Segl ed in Bregaglia. Scenas tragicas e culissas idillicas as preschaintan eir parallelmaing. Uschè per exaimpel la mort dal bap Fortunat a Castelmur in lavina: «Ün sbreg stit, ed el eira indrumanzo e pers suot l'immensa lavina. [...] Scu sch'ünguotta nu füss sto, gaiavan las nüvlas alvas sur la cunträdgia, as sbalunzchand in ün ventin chaprizius, mussand da temp in temp ün töch tschêl blov gianzauna.» (p. 63) Eir scenas crudelas, scu la tortura da l'abat Teodor Schlegel, chi faun part da la realited da quel temp, vegnan preschantedas in möd extais.

Il stil poetic ed abundant da Selina Chönz sto per part in contrast culla crudeltd dals fats istorics e la modestia da la vita muntagnarda. Quista differenza reflectescha forsa eir la societed divisa dal temp dal feudalism: ün muond da chavaliers, chastlauns, abats ed uvauchs chi's distingua fermamaing da quel dals purs dependents e sfurzos «da cultiver bain lur ers e da'ls mantegner in prüma cundizion per pudair consegner a lur patron la deschma prescritta.» (p. 17) Al listess mumaint es la lingua da l'autura Selina Chönz fich richa, egnä ed arcaica – ella po per consequenza esser fascinanta taunt pel lectur pü attempo scu eir per quel pü giuven.

L'istorgia es accumpagneda dad ün purtret sgiaglio in öli da l'artist Constant Könz. La reediziun chüreda dal romanist Jachen Andry e da l'editura Mevina Puorger es gnida cumpletedda cun üna nota editoriela, cun ün glossari chi declera pleds e fuormas «chi nu sun registros i's vocabularis» dad hoz (p. 120) ed üna postfacziun chi contextualisescha l'autura, l'ouvrage e la protagonista.

La chastlauna ans maina tres temps passos e cuntredgias da bellezza ed es üna scuierta litterara e rescuierta da l'autura rumauntscha da renom mundiel, Selina Chönz.

Selina Chönz, *La chastlauna*, editionmevinapuorger, Turich 2017, 29 francs